

2 TIMOTI

Rau Yo Paulu Iwode Pang Timoti I, In Ru Ki

1 ¹Au Paulu yo aposol ke Yesu Kirisi i, in la awodo rau naii pong Timoti i. Ngan ye Maro ya taunu lono, ngan ipootau be ayei aposol a be nen ngan awetewete pang di tooltool ye betanga yo Maro ipamede ye yepongo dook mata yo ipa ye Yesu Kirisi i. ²Timoti, awodo rau naii pong. Ong in dawa ben au natuk yo lok panga mai san i. Nen le apatarau pang Tamada Maro iye Yesu Kirisi yo Tool Mai kiidi i, ngan be yaru lodi pong a tiyei dada dook mata pong inbe tikaua lo silene kidi pong.

Kin Le Moomoodoo Ye Bingi Dook Mata Ke Yesu Be

³Au i ye ke le bong tina yo kanakana ngan apatarau ye nga, ngan apootoo em a awete lo ponana kiau pang Maro yong. Ngan Maro tani yo muku ngan di sasa kiau tisung panga i, in la asung panga lapau ye lok yo iken galangana dook mata ye matana i. ⁴Inbe lok tutong ye kene yo be taparmagiri ye in ngan lulum rar ye matam nga. Ngan la lok be le akamatong kasin mulu a be nen ngan lok ponana dook. ⁵Inbe lok tutong lapau ye lom medana moolmool yo kutaru pang Yesu Kirisi i, in muku ngan iken ye tium garup yo Lois i, inbe iken ye tinam yo Yunis i, in lapau. Le lok galanga yong be kutara lom medana nen lapau. ⁶Ngan nanga, lok be apamaditi lom a kuyei urata ye gurana ke Maro yo ikauu pong ye lo ponana ki ye kene yo apaloko baek lo kutom ye i, a be nen ngan kuyei i ikan dawa ben tayipraia ei a ilolo nga. ⁷Kuyei nen, yesoo Maro iyei idi a be tatattadai, ngan tiap. Bong iyei idi le ke be takodo le tamede, inbe lodo pang di tooltool mai san, inbe idi taudu takaptutidi dook ye panga kiidi.

⁸Ngan la Timoti, kin kutattadai a moomoom yo be kuwetewete bingi dook mata ke Tool Mai kiidi pang di tooltool, ngan be. Inbe kin moomoom yau ye yo ayei urata ke Yesu Kirisi a le tikau au a titarau

lo rumu dook tiap kidi talnga dikidiki lono, ngan be. Bong kukodo le kumede ye gurana ke Maro a kuwau au ye solanga masngana ye urata ke raingi bingi dook mata pang di tooltool. ⁹Ngan Maro ipamulidi ye so dook tiap yo be igarungidi i, a ipootidi panga ya taunu be tatoo dada dook mata yo lono be tatoo i. Ngan ye yo a le iyei nen nga, yesoo mukot yege ni ngan lon kaua dada atu nen be ole lono paidi a iyei dada dook mata paidi. Ye dada dook mata tani yo iyei i, in ye urata dook mata sa yo tayeii, in tiap. Bong ya taunu lono paidi a iyei dada dook mata paidi ye Yesu Kirisi. ¹⁰Bong Maro lono tani yo paidi i, in nookoot nga ipatnaii paidi ye Yesu Kirisi, tool tani yo be ipamulidi ye so dook tiap yo be igarungidi i, in le si pombe mallangana. Ya in irautoo gurana ke matenge le idu ke lopo, inbe ipatnaia dada ke be takaua yepongo dook mata tani yo taukan motingi i, in ye bingi dook mata yo iweteweta paidi i. ¹¹Nen le ye bingi dook mata tani i, in la Maro ipootau be awetewete betanga ki pang di tooltool, inbe ayei aposol, inbe ayei pannoongoo ye i. ¹²Ngan ye punu i, in la le asolo masngana mai ye i. Bong au i moomook ye tiap, yesoo lok galanga ye tool yo atara lok medana panga i. Inbe lok galanga be ya la ole matan kala urata ke raingi bingi dook mata yo ikauu pau i, a be nen ngan iken dook mata nen le ilo ye lal yo be Tool Mai kiidi isi be si ikarata betanga kidi tooltool ye i.^a

¹³Le Timoti, betanga yo kulongo ye kook nga, ngan kuparama le imede a be nen ngan ipasongosongong ye patomonaingi dook mata yo tarantatu nga. Le ye kene yo be kupatomonai di tooltool ye betanga tani nga, ngan ole kutara lom medana pang Yesu Kirisi, inbe lom pang di tooltool mai san ye gurana yo ipa ye Yesu Kirisi nga. ¹⁴Inbe matam kala bingi dook mata yo Maro ikauu pong, in dook. Ngan ole Maro Amunu Silene yo iyepe lodo i, in la be ilonong i.

¹⁵Ong in lom galanga nen, di tooltool ke Kirisi le imot yo tiyepe ye tana mai ke Esia nga, ngan tiwala murididi pau. Inbe Pigelus iye Emogenes ngan tiwala murididi pau lapau. ¹⁶Bong lok be Tool Mai ole lono pang di tooltool le imot yo tiyepe rumu ke Onesiporas nga, a be nen ngan ilon di. Yesoo, Onesiporas tani in moomoonoo yau tiap, bong iyei dada dook mata pau le lok ponana mulu ye kene yo ayepe ye rumu dook tiap kidi talnga dikidiki lono ye i. ¹⁷Ngan nen le ye kene yo iman pombe ye malala mai Rom nga, ngan ikaua urata mai ye serengau le le ipuske au. ¹⁸Ngan la lok be Tool Mai ole lono panga a iloni ye lal yo be imulu a isi be si

^a 1:12 Di tooltool kapala yo lodi galanga ye Rau ke Maro nga, ngan tiwete arono i, in itoo dada san mulu in nen: *Ngan ye punu i, in la le asolo masngana mai ye i. Bong au i moomook ye tiap, yesoo lok galanga ye tool yo atara lok medana panga i. Inbe lok galanga be ya la ole matan kala so yo ataru panga i, a be nen ngan iken dook mata nen le ilo ye lal yo be Tool Mai kiidi isi be si ikarata betanga kidi tooltool ye i.*

ikarata betanga kidi tooltool ye i. Ngan ong taum in lom galanga nen ye kene yo ayepe Epeses nga, ngan Onesiporas tani in ilonau dook mata san ye so alunu.

Tool Ke Patokongo Yo Ke Yesu Kirisi I

2 ¹Nen le natuk, kukodo le kumede ye Yesu Kirisi yo lono paidi a iyei dada dook mata paidi i. ²Inbe ye betanga tina yo akodo dama kidi tooltool alunu matadi inbe awete pong nga, ngan kop pang di tooltool yo lom tar di be di ngan tooltool moolmool nga, a be nen ngan tipatomonai di tooltool kapala ye. ³Le Timoti, kukodo le kumede a kuwau am ye solanga urata moonoo ben tool ke patokongo ke Yesu Kirisi nga. ⁴Kumata, tool sa be iyei urata ben tool ke patokongo inbe la iyei urata matana matana kapala mulu tiap. Bong tool tani in lono be tool kuto mai ki ke patokongo in lon ponana ye nga, ngan ole iyei urata ataleu ben tool ke patokongo nga le iken leu. ⁵Ngan gaongo leu, kumata le be tool atu sa itoo noonongoo ke parsukungu tiap inbe lono be idada ye ni ke parsukungu nga, ngan o ke be ikap touo balingi siap. Bong kumata le be itoo noonongoo dook mata nga, ngan la be ikaua balingi ye urata kootoonoo ki nga. ⁶Kumata, tool ke kapkingi yo ikaua urata le gurana mata i, in ya la be imuku ye kaningi so matana ye so tina yo ikapki ye kumu ki nga. ⁷Le Timoti, lom kaua urata ye betanga tina yo akatte betanga ye nga le ikenen leu. Yesoo, kumata le be kuyei nen nga, ngan ole Tool Mai ilonong a ipagalanga lom ye betanga tina ngan le imot.

⁸Kin lom tutu Yesu Kirisi yo sasa ke Dawiti i, in le ikenen leu. Ya in Maro ipamaditi ye ni ke matenge, le i bingi dook mata tani yo araii pang di tooltool in naii. ⁹Ngan ye bingi dook mata tani yo araii pang di tooltool i, in la asolo urata moonoo ye a tipau au ye ooroo medana a titarau se ayepe rumu dook tiap kidi talnga dikidiki lono ben au tool ke talnga dikidiki nga. Bong bingi dook mata ke Maro, in ke be tipauu ye ooroo medana tiap. ¹⁰Ngan la lok be asolo urata moonoo ye so nen le imot a be nen ngan di tooltool yo Maro ipootoo di panga nga, ngan di lapau titara lodi medana pang Yesu Kirisi. Kumata le be tiyei nen ngan la be ipamulu di ye so dook tiap yo be igarung di i, inbe ikap di a lo iye di tiyepe ye yepongo dook mata yo taukan motingi i, in ye malala yo di tooltool tikamata ene ngan mai san ke be tipayiti ye i.

¹¹Nen le betanga yo tiweta i, in moolmool.

Kumata le be taye Yesu tammata nga,
ngan ole lo taye tayepe lapau.

¹²Inbe kumata le be takodo le tutube ye Yesu Kirisi a tasolo urata moonoo nga,

ngan ole taye taye ben di tooltool kuto maimai ke tana i lapau.
Bong kumata le tawete be lod galanga ye tiap nga,

ngan ole ya iwete be lon galanga yidi tiap lapau.

¹³ Ngan kumata be idi nga tatoo betanga ke Yesu le imot tiap nga, ngan ke be ya in iyei nen tiap.

Bong ole itoo betanga ki le imot, yesoo ya in ke be iwete betanga lo ngan be ipalele koonoo ye mulu tiap.

Timoti Kukodo Le Kumede Ye Urata Ke Maro

¹⁴ Timoti, kin kupamadit di tooltool yo titara lodi medana ngan ye betanga tina yo awete ngan le ikenen leu. Inbe kuwete a kulele di ye Maro ene nen, kin koodi parkap ye betebetanga be. Ngan betanga tina yo nen nga, ngan dook mata ke be ilon di pitiap yege, bong ole igarungu di tooltool yo titar talngadi a tilongo betanga kidi ngan lodi. ¹⁵ Inbe kuyei urata le guram ye Maro matana a be ikamatong ngan lono dook mata pong. Le kuyei urata nen le dawa ben tool yo iyei urata dook mata ngan le ke be moomoonoo ye tiap i. Inbe kuyei urata nen le dawa ben tool yo ipatomonai di tooltool tarantatu ye betanga moolmool ke Maro i. ¹⁶ Bong kuyepe manga mooloo ye di tooltool yo tiwete sokorai a betanga kidi ngan itoosap dada dook mata yo Maro lono be tatoo nga. Yesoo, betanga yo tiwete nga, ngan ole iyei di tooltool le titoo dada dook tiap ki taunu yo Maro lono be tatoo tiap nga. ¹⁷ Ngan patomonaingi kidi tooltool tina ngan ole ingaua ni mai le imot dawa ben botoboto dook tiap yo ikan di tooltool tinidi, ngan le ikan tootoo pang gigini i. Ngan di tooltool tina yo tiwetewete betanga dook tiap nen nga, ngan di diedi ru la Aimenias ye Piletus nga. ¹⁸ Di suru tina ngan tiyege betanga moolmool ke Maro, inbe tipatomonai di tooltool nen be Maro ipamadit di tooltool yo timmata nga, ngan ye ni ke matenge oo. Nen le tigarungu lo medana kidi tooltool kapala yo titaru pang Kirisi i. ¹⁹ Bong betanga moolmool yo ke Maro i, in ikodo le imede dawa ben sauwa yo Maro ipe le imede a ire rumu ki ye i. Ngan sauwa tani in tiwodo betanga ru la ilo ye nga. Atu in nen, “Tool Mai in lon galanga ye di tooltool yo ya ki nga, ngan oo.”^b Inbe betanga tina ngan san mulu in nen, “Di tooltool yo tiwete be di ngan ke Tool Mai nga, ngan ole tiwala muridi pang dada yo dook tiap nga.”

²⁰ Ngan ye rumu somai ke tool ballingana atu, in bor le tawiri la iken lono nga. Ngan so tina ngan tika-rata ye pat medana dook mata yo tiwete edi ye gol le silba ngan leu tiap, bong kapala ngan tika-rata ye kai le tana lapau. Ngan bor le tawiri yo tika-rata ye gol le silba nga, ngan be pang urata dook mata yo be lodi ponana ye nga. Inbe so tina ngan kapala yo tika-rata ye kai le tana nga, ngan be pang urata kapala. ²¹ Ngan nanga, kumata be tool sa iwala murini pang urata yo dook tiap nga, inbe iyepe le tinin galanga ye Maro matana nga, ngan ya in dawa ben bor le tawiri

^b 2:19 Kinkatingi 16:5

yo tika-rata ye gol le silba pang urata dook mata yo be lodi ponana ye nga. Nen le tool tani in ole dawa ben bor le tawiri yo rumu taunu ipootoo panga be iyei urata ki le imot yo dook mata ngan ye nga.

²²Bong Timoti, kuyepe manga mooloo ye dada dook tiap yo di kakase paunu ngan lodi be tiyei nga. Inbe kutoo dada dook mata noonoonoo ke Maro, inbe kutara lom medana panga, inbe lom pang di tooltool kapala mai san, inbe lom iken silene. Ngan kutoo dada yo nga, ngan kuye di tooltool yo tisung pang Tool Mai ye lodi yo titaru moolmool panga i. ²³Inbe kuyepe manga mooloo ye di tooltool yo lodi galanga ye dada moolmool ke Maro tiap inbe taukadi lo galanga a tiye di diedi tiparsu ye betebetanga nga. Yesoo, lom galanga nen be tiparsu nga, ngan ole tipamaditi malmal. ²⁴Ngan tool yo iyei urata pang Tool Mai ben kapraingi ki i, in ke be iye di tooltool tiparsu ye betebetanga tiap. Bong ya in ke be iyei dada dook mata pang di tooltool nga le imot a ipatomonai di ye betanga moolmool. Inbe ya in ke be ikap malmal tarai pang di tiap. ²⁵Bong tool tani in ole iwete betanga mos leu pang di tooltool yo tipili betanga ki nga. Ngan ole iyei nen, yesoo ya lono be nen ngan Maro imalum pang di tooltool tina a tiportak lodi, inbe ilon di a lodi galanga ye betanga moolmool. ²⁶Inbe tool tani in ole iwete a ikarata betanga pang di a be nen ngan lodi galanga a tikoo ye dowo ke tool dook tiap Satan yo ikap di a iparama di be tiyei urata yo lono be tiyei nga.

Ole Di Tooltool Tiwala Muridi Pang Maro

3 ¹Timoti, au i lok be lom galanga nen, ye ke tina yo nookoot tayepe ye nga le ilo ye lal yo be Yesu imulu a isi ye in nga, ngan ole urata moonoo dook tiap la be pombe i. ²Yesoo, ye kene tani in ngan ole di tooltool lodi mai san pang di tapdi leu, inbe lodi mai san pang pat ke yimoongoo so, inbe lodi tar be di ngan edi maimai le di tapdi tiyitmak edi, inbe tiwete betanga dook tiap pang di tooltool kapala, inbe tilongo betanga kidi tamadi le tinadi a titoo tiap, inbe tiwete lo ponana kidi pang di tooltool yo tilon di ngan tiap, inbe titoo dada dook mata yo Maro lono be tatoo ngan tiap lapau. ³Inbe ole di tooltool lodi mai san pang di tooltool kapala pitiap yege, inbe lodi be tiye di diede tika-rata betanga a tigauagaua tiap, inbe tiwete mur ye di diedi, inbe tikaptut di dook ye yepongo kidi tiap, inbe tikap masngana pang di tooltool kapala, inbe lodi pang dada dook mata yo noonoonoo ngan tiap lapau. ⁴Inbe ole tikap di diedi a titar di la di koi kidi baedi, inbe katedi ro ye so yo tiyei nga, inbe lodi tar nen be di ngan edi maimai le tooltool kapala tiyepe parmadi, inbe lodi mai san pang so yo tiyei a lodi ponana ye nga le lodi mai san pang Maro tiap. ⁵Inbe ole tiyei ben di tooltool yo titoo dada dook mata le imot yo Maro lono be tatoo nga, bong di ngan tiwala muridi pang gurana ke Maro yo be iportak di a titoo dada dook mata le imot yo Maro lono be

tattoo nga. Le Timoti, kuyepe manga mooloo ye di tooltool yo nen nga. ⁶Yesoo, di tooltool tina ngan ole tila koodi pawesera di garup yo taukadi lo galanga nga, a tilo rumu lono kidi, inbe tikap lungunu ye di. Ngan di garup tina ngan tisolo urata moonoo ye noonoo kidi yo tiyei nga. Inbe dada dook tiap matana matana yo lodi be tiyei nga, ngan ole iyolo di le la tiyei noonoo. ⁷Nen le kanakana ngan di garup tina lodi be tilongo betanga yo matana matana ngan leu, bong ke be lodi galanga ye betanga yo moolmool ngan tiap. ⁸Di tooltool ke kaplungunu tina ngan dawa ben Yanes iye Yambares yo muku ngan tikapye be tiraautoo urata ke Mose nga. Ngan dada gaongo leu, tikapye be tiraautoo betanga moolmool. Di ngan kutodi lono ikau urata dook tiap le lodi kap gogo dada dook tiap. Inbe di ngan tikapsap ye dada dook mata yo tatara lodo medana pang Kirisi ye i. ⁹Bong di tooltool ke kaplungunu tina o ke be tikap lungunu ye di tooltool le mooloo mata ngan tiap, yesoo di tooltool ole lodi galanga ye di be ngan tiyei kapa dawa ben muku ngan Yanes iye Yambares tiyei kapa nga.

Kuparama Betanga Ke Maro Le Imede

¹⁰Bong Timoti, ong in lom galanga dook ye patomonaingi kiau, inbe ye yepongo kiau, inbe ye so yo lok kap be ayei nga, inbe ye lok medana yo ataru i. Inbe lom galanga yau nen au i ke be katek malmal tarai tiap, bong lok pang di tooltool mai san, inbe akodo le tutube a asolo urata moonoo yo pombe pang yau nga. ¹¹Inbe lom galanga yau nen, di tooltool tiyei dada dook tiap a tigarungau ye yo atoo Kirisi nga, le lom galanga ye masngana dook tiap yo pombe pang yau i. Inbe lom galanga ye masngana tina ngan pombe pang yau la Antiok le Aikoniam le Listara nga. Ngan di tooltool tiyei dada dook tiap a tigarungau ye yo atoo Kirisi nga, bong Tool Mai la ilonau a ipamulau ye urata dook tiap tina yo tiyei pau nga. ¹²Bong awete pong nen, di tooltool le imot yo lodi be titoo dada dook mata le imot yo Maro lono be tattoo nga, inbe titara lodi medana pang Yesu Kirisi nga, ngan ole di tooltool tiyei dada dook tiap nen a tigarung di ye lapau. ¹³Bong di tooltool yo dook tiap ngan tiye di tooltool ke kaplungunu ole tiyei dada dook tiap le dook tiap ki taunu. Ole tillung di tooltool, inbe di tooltool kapala ole tillung di lapau. ¹⁴Bong Timoti, ong in lom galanga ye di tooltool yo tipatomonai ong ngan nen, be di ngan tiwete betanga moolmool. Le kutoo betanga yo tipatomonai ong ye nga, inbe kutara lom medana ye le ikenen leu. ¹⁵Yesoo, ye kene yo ong kase ye in nga, ngan ong in lom galanga ye rau mison ke Maro. Ngan rau tani in la ipagalanga lom nen be Maro ipamulong ye so dook tiap yo be igarungong in ye lom medana yo kutaru pang Yesu Kirisi i. ¹⁶Betanga le imot yo tiwodo lo ye Rau ke Maro nga, ngan ipa ye Amunu. Nen le betanga tina ngan dook mata ke be ilonidi a tapatomonai di tooltool ye, inbe tawete pang di a talele di ye dada dook tiap yo tiyei nga, inbe tapadun di ye panga kidi, inbe tapatomonai di ye dada dook mata noonoonoo ke Maro. ¹⁷Inbe

Rau ke Maro tani in ke be ipamede di tooltool ki a be nen ngan tiyei urata matana matana yo dook mata nga le imot.

Kuwetewete Bingi Dook Mata Ke Maro

4 ¹Timoti, au lok be awete betanga medana pong ye Maro iye Yesu Kirisi matadi. Ngan Yesu in tool tani yo be ikarata betanga kidi tooltool yo tiyepe matadi rerene nga, inbe di tooltool yo timmata koot nga, ngan lapau. Inbe ya in tool tani yo be isi pombe mallangana a be matan kala di tooltool ki i. Nen le ye Maro iye Yesu Kirisi matadi ngan awete betanga medana tani pong nen, ²kin kuwetewete bingi dook mata ke Maro pang di tooltool. Le be di tooltool lodi be tilonga too tilonga tiap nga, ngan dook mata, bong ong in kukaratong dook a kuwetewete bingi dook mata tani in pang di. Nen le kupadun di ye panga kidi, inbe kuwete le koom mede a kulele di ye dada dook tiap kidi yo tiyei nga, inbe kupamede lodi lapau. Le ye kene yo be kuyei so yo nga, ngan kin katem malmal tarai pang di be, bong kupatomonai di dook. ³Ngan kuyei so yo nga, yesoo pang dama ni nga, ngan ole di tooltool lodi be titar talngadi a tilongo betanga yo tarantatu, ngan tiap. Bong ye di tapdi lodi ngan be tikap di tooltool alunu be man tipatomonai di ye betanga yo tiwete pang di a tilongo, ngan talngadi gorengana ye nga. ⁴Di tooltool tina ole lodi be titar talngadi a tilongo betanga yo moolmool in tiap, bong titar talngadi pang betanga sokorai yo taukan punu nga. ⁵Bong Timoti, ong taum kin koptutong dook ye lal nga le imot a nen ngan kukodo le tutube a kusolo urata moonoo yo be pombe pang yong nga, inbe kuraia bingi dook mata pang di tooltool yo lodi galanga ye Maro tiap nga, inbe kuyei urata ye so le imot yo Maro ikap pong be kuyei nga.

Paulu Ikanamaii Ngan Potai Be Imata

⁶Ngan ye yo awete pong nen nga, yesoo lal kiau yo be ayege tana ye in iman potai oo. Nen le rara kiau i dawa ben ooroo wain surunu yo di tooltool ke paroranga so titoo be tiyei paroranga pang Maro ye i. ⁷Au i apatoko ye patokongo yo dook mata i, inbe adada ye ni ke parsukungu a aman pombe ye ker oo, inbe bingi dook mata ke Maro yo idi nga tatara lodo medana ye i, in aparama le imede. ⁸Le nookoot nga balingi kiau la iken a inamau ye malala ke Maro ngo. Ngan balingi tani in nen ole Tool Mai ipootau be au i tool noonoonoo. Le ye lal yo be Tool Mai imulu a isi be si ikarata betanga kidi tooltool ye dada ki yo noonoonoo in nga, ngan ole ikauu pau. Bong o ke be ikauu pau au taleu tiap. Ole ikap pang di tooltool le imot yo lodi be tikamata imulu a isi pombe mallangana nga, ngan lapau.

Timoti Be Ipa Tarai A Iman Pang Ye Paulu

⁹Timoti, au i lok be kusere dada sa yo be kuman pang yau palbe leu ye i. ¹⁰Yesoo, Demas in lono mai san pang so yo ke tana i nga le iyegau

a ila pang malala mai Tesalonaika oo. Inbe Keresen in ila pang tana mai Galesia, inbe Titi in ila pang Dalmatia. ¹¹Le Luka ya taleu la amru amyepe i. Ngan la kene yo be kuman ye in nga, ngan kouo Maka a angru kaman. Yesoo, ya in tool dook mata ke be ilonau ye urata kiau. ¹²Ngan Tikikus in la awanga a imala pang malala mai Epeses oo. ¹³Inbe ye kene yo be kuman ye in nga, ngan kouo sousoungu kiau matolene yo ayege a iken Toroas ye rumu ke Kapus in a kuman. Inbe kop rau lulungu kiau, inbe kin lom kalli be a kop rau lulungu kapala yo tikaata ye asara kulidi ngan a kuman lapau.

¹⁴Aleksanda tool yo ikarata tutui i, in iyei dada dook tiap pau mai mata. Nen le Tool Mai ole iraua dada dook tiap ki tani yo iyei pau, in kootoonoo. ¹⁵Le ong lapau, kin kukawai yong dook ye. Yesoo, ya in ikapye be le irautoo betanga yo kiidi nga.

¹⁶Ye kulkulunu kiau lo akodo dama ke tool ke karatanga betanga inbe arau betanga ki nga, ngan tool atu sa be man ikata suanga yau, ngan tiap. Bong di le imot tiyegau. Ngan tiyei dada nen pau, bong apatarau pang Maro be kin lon tutu dada dook tiap kidi, in be. ¹⁷Ngan tiyei nen, bong Tool Mai si ikodo gigik, inbe ipamedau ke be awetewete bingi dook mata be nen a di tooltool yo tipa ye rara kidi Yuda tiap nga, ngan tilonga. Le dawa ben ikau au ye asara gok yo ene laion in koonoo a asi tana. ¹⁸Ngan nanga, Tool Mai ole ikau au a ilonau ye so dook tiap le imot yo be igarungau nga. Inbe ole ikau au dook mata le alo ye di tooltool ki yo be matan kala di ye malala ke Maro nga. Ya in ene mai san ke be di tooltool tipayiti le ikenen leu le taukan motingi. Moolmool.

¹⁹Timoti, kuwete lo ponana kiau pang Pirisila iye Akuila inbe pang di tooltool le imot yo tiyepe rumu ke Onesiporas ngan lapau. ²⁰Erastus in la iyepe malala mai Korin ni. Inbe Toropimus in la matamatenge kauu a ayege sila iyepe malala mai Miletus ni. ²¹Ngan la Timoti au lok be kusere dada sa yo be kuman pang yau ye i, lo ngan be talo ye lal ke mou kooti. Le Ibulus iye Pudon ye Linus ye Kolodia, inbe di diede yo titara lodi medana a aye di amyepe ni nga, ngan tiyawar lo ponana kidi pong.

²²Le apatarau pang Tool Mai nen, be iyepe yong, inbe Maro ole lono pang a iyei dada dook mata pang.